



皇明開國功臣錄卷十七

定遠黃金

周凱 費賢 趙繼祖 孫茂先 林濟峯

張德 丁玉 瞿通 王珪 韋權

朱文 馬雲 葉旺 陳方亮 翁正

耿忠 趙清 李勝 李恪 劉真

周凱國初從征取建康克南徐下毗陵定有江南諸
郡邑摧鋒破敵招降撫順所向成功由帥職歷陞湖
廣行省左丞洪武元年佐征中原克晉冀太原平陽
等處二年春克陝西趨鳳翔有旨特命統兵還征

唐州初登愈兵下唐州以指揮朱某守之後唐州兵
亂殺朱指揮蘇家寨賊將老馬劉及南陽郡縣皆相
應而起事聞故命凱同楊璟等討之兵至擒戮其首
惡捕其潰亡脅從者宥之南陽悉平

費子賢國初從舉義渡江拔采石取太平擢管軍總
管丙申破敵砦定臺城覆南徐五月克廣德陞廣德
翼元帥守禦丁酉下毗陵宣州收江陰皆預有功時
張士誠據有浙西日事剽竊其重兵皆屯舊館等處
上命諸將規取湖州是年九月子賢率兵取武康克之
戊戌領兵攻破安吉 上即命子賢守其地子賢因

築城守之士誠連歲出兵來攻皆為子賢所敗乙巳
冬十二月士誠復遣其將張左丞帥兵八萬來攻子
賢所部僅三千人堅壁拒守城上設車弩以禦之因
射殺其梟將二人敵驚潰以功陞指揮同知丙午十
一月湖州平調率所部從諸將圍蘇州戮力合攻丁
未九月破其城士誠就擒賜綵段表裏五匹陞指揮
使十月胡廷美何文輝征福建子賢從行十一月壬
寅度杉關下光澤十二月丁未克邵武丁巳克建陽
洪武元年正月率師至建寧元守將達里麻陳子琦
同謀圖禦我師環其四面攻之日急達里麻不能支

以壬辰出降遂克其城執子琦送京師獲將士九千餘人馬二百七十餘疋銀一萬九千餘兩糧九萬九千餘石以子賢領兵守其城四月調征中原七月取河北衛輝彰德廣平進克臨清德州閏七月戊午大將軍徐達師至長蘆元守將左僉院遁去命子賢守之達遂趨滄州下之遣人諭子賢分兵守滄州大軍北取元都子賢防禦慎密二年冬大賞征南定中原及守備功賜白金文幣三年春調征定西復回禦十一月天下既定論功行賞陞驃騎將軍大都督府僉事仍令子孫世襲指揮子賢在開國為名將戰勝攻取自其謀勇中來而維城之烈著于安吉者至以三千之寡走八萬之衆可謂奇備不常者矣視耿炳文守長興蓋其流亞云

趙繼祖臨滏人勇力過人至正壬辰從舉義隸滁陽王麾下時上亦在王甥館掌兵柄繼祖傾心以附上特親信之從克滁州收諸寇砦乙未閏正月上謀取和州繼祖同張天祐率兵以往日暮與元兵遇擊敗之遂據其城元平章也先帖木兒乘夜遁去以功擢總管上駐師和州元兵復來攻衆數十萬繼祖從諸將戰却之復敗新塘及青山等處寇兵六月扈

蹕渡江拔采石取太平戰溧陽丙申二月從破蠻子
海牙水砦三月覆陳兆先營擒之進克金陵乘勝東
取鎮江陞副元帥八月從攻常州丁酉三月常州平
陞長一作常春分院判官領兵協守其地六月己未以
上命與元帥郭天祿鎮撫吳良取江陰州張士誠兵據
秦望山以拒我帥繼祖引兵攻之會大風雨其兵奔
潰我師據其山翌日進攻州之西門遂克其城既得
江陰則士誠舟師不敢泝大江上金焦侵軼之路頓
絕

孫茂先國初從征渡江克采石太平溧陽蕪湖皆先
登丙申攻破蠻子海牙水寨及陳兆先營授管軍總
管進取金陵順流東下取鎮江轉擊廣德是年從攻
毗陵丁酉三月下之陞元帥尋克寧國五月從攻徽
州敗門思午不花兵時鄧愈以樞判鎮徽茂先為部
將十一月與椎峯翼元帥王遇成會兵徇昌化又攻
泥窰寨克之戊戌以愈命偕王弼孫虎汪同取婺源
州兵至城西與元守將鐵木兒不花戰自旦至日昃
殺傷五百餘人不下乃分兵逼之茂先攻北門王弼
孫虎攻南門汪同攻東門三道並進復殺三千餘人
遂拔其城斬鐵木兒不花獲士卒三千人以茂先領

兵守禦己亥四月己丑張士誠將李伯昇率兵來寇
茂先擊敗之辛丑從

上征陳友諒克安慶擣九江取興國癸卯陳友諒敗死
領兵克復吉安安福永新等處斬獲賊人數多策應
袁州征進萍鄉虎背寨茶陵岳州潭澧諸郡陞襄陽
衛指揮副使愈總兵鎮襄陽仍屬焉時人民初附兵
戈未息王保保又覬覦西北茂先與王成等協力佐
愈境宇用寧洪武元年王師克汝儀向河洛

上以手書命愈協取河南愈遣茂先與成率兵分道取
南陽首克唐州再取諸州巴山寨所向克捷八月調
從大將取晉冀二年冬大賞征南及守禦功賜白金
文幣三年中原既平陞指揮使

林濟峯國初從征討歷有戰功官左丞陞大都督府
僉事洪武初西安都指揮使缺員出濟峯往署其事
詰曰握乾符君天下惟陳紀而立綱施以當時取法
後世所以為王者也朕受

上天明命履前王之規發號施令但有賞善罰惡耳
所以內有中書都府臺察外有行省都衛及指揮使
司皆重任所在以居功德者然而都府係總天下之
雄師都衛亦總方面之勅兵若居是職者選非輕易

任非薄功邇來西安衛都指揮濮英等情事弗勤不謀怯敵是致歸者失於撫勞逸者終不復還為斯官不稱任難居重位詔令還朝送付法司責問難易其西安所在機務甚重不可一時缺官今特內調都府僉事業昇林濟峯前往署事以長兵戎爾昇濟峯當夙夜勤勞雄鎮番胡使遠人入貢庶稱朕懷於戲深高城隍實邊戍之首務列旌旄而張赤幟必壯軍威爾惟懋哉後數年復為大都督府僉事

張德國初從智取江南郡邑以功授總管張士誠據浙西屯兵舊官秀事剽剽上命諸將規取湖州歲

戊戌克安吉命德與元帥費子賢同守之築城設樓櫓嚴號令謹斥堠士誠連歲出兵來攻輒為德等所敗陞管軍千戶乙巳十二月乙卯士誠復遣張左丞帥兵八萬來寇城中守兵甚少德與子賢堅壁拒守設車弩於城上禦之因射殺其梟將二人敵驚潰丙午湖州平調征蘇州丁未九月吳平賜綵段表裏繼以征闕浙取中原功歷陞指揮使天下既定遷大都督府都督僉事十三年更定官制改右軍都督僉事十四年十月衢處溫三府山寇吳達三葉丁香等連結作亂命德同延安侯唐勝宗總兵討之十一月安

福縣民作亂福州指揮李惠率兵致討賊聚衆八千
餘人拒敵時福州右衛指揮張春以兵來會賊懼遁
入山谷適德興延安兵至處州平陽等處聞賊遁乃
分遣兵士追捕獲賊衆二千五百人餘黨分散潛匿
尋討平之十二月擒衢處溫首賊吳達三葉丁香及
其黨三千二百餘人家屬一千五百餘人斬首二百
八十級餘寇遂平十五年正月旋師賞功以田勅諭
之曰古之為將者其道有四曰智曰信曰勇曰仁知
在筭無遺策信在戰無後期勇在摧敵仁以撫下故
能建立事功垂譽後世也邇者浙東山民煽聚電衆
害民命卿為偏將軍與延安侯同往不逾五月而平
之今既凱旋賜卿田一庄為子孫世祿於戲成功不
易保之尤難卿尚勉之

丁玉初名國珍仕韓林兒為監察御史才辨有時譽
太祖用為九江知府彭澤縣山民叛國珍以為比候官
軍之來恐緩不及事即集鄉兵親詣叛處殺敗賊衆
以安民姓事 聞賜鞍馬以其有武略轉為指揮更
名玉自是從征屢立戰功陳友諒敗死從克武昌荆
常潭澧諸郡甲辰冬同傅友德克衡州鄧祖勝棄城
遁玉遂守其地改衡州衛指揮洪武元年平章楊璟

克永州調玉守之威望甚著天下既定陞都衛指揮使尋遷廣西等處行中書省叅政兼都衛指揮使鎮廣西以仁惠為政軍民悅服數年陞御史大夫洪武十年松州等處蠻寇為亂

上命玉為平羌將軍率師討之十一年正月克平松州三月上以勅諭玉曰松潘僻在萬山接西羌之境朕豈欲窮兵遠討而蠻酋屢入為寇擾我邊民命爾師征之不得已也三月三日捷至知松州已克除將資糧於容州進取潘州若盡三州之地則疊州不須窮兵料彼聞大軍聲勢理必可服但高城深池擇士

卒有阻遏者守約都疊溪之路其青川驛道無阻遏者不守可也凡東降諸酋長必遣入覲親撫諭之勅至可分一軍先還四川別有調遣四月置松州衛指揮使司初松州平玉遣寧州衛指揮高顯等城其地請立軍衛至是降印設官領軍戍守六月復勅玉曰大軍入松州克戎虜千萬山之中設官置衛以威虜夷爾之功懋焉朕聞松州山多田少耕種恐不能贍軍若以人民供億則是用有用之民守無用之地非良策也可相度其宜或於保寧及擇要害之處立衛爾與部下諸將計議來奏既而玉言松州為西羌諸

靈要地軍衛不可罷從之遂詔玉還軍四川七月討
四川賊人彭普貴等平之初普貴等為首玉盡殲其
衆遣人奏捷 上以勅勞之曰舊歲妖人作亂命爾
西征爾跋涉山川究心日夜奮揚威武勦絕其類以
除民患朕甚爾嘉以今觀之非惟人事之當然實天
有以相之也始妖人暗構愚民已有年矣土民因而
作亂乘時蠢起爾之未至四川也指揮普亮等用師
不律致妖人殺害良民至今猶未加刑故特遣人勞
爾之功命以軍法從事夫國之用將所以捍禦奸侮
他如亮者安能保其祿位乎罪不可宥如勅行之十

二年玉還自四川賜文綺帛鈔錠拜大都督府左都
督十三年坐黨論死

瞿通合肥人元末江淮兵起通善長鎗號長鎗十戶
太祖駐師和陽從諸將來歸渡江取姑孰克金陵定江

南諸州郡積功至鳳陽衛指揮使天下既定陞大都

督府都督僉事致仕卒贈右都督子能

字世賢智勇
過人亦歷有

戰功洪武以都督僉事守雲南麓川刀干孟構兵逐

其主思倫發能率兵大破其衆又征寧遠金齒有功

蠻夷震懾邊境謐寧

王珪合肥人慷慨有大志少為淮西廉訪司隸卒見

官長儀衛尊崇輒慨然歎曰將相無種在人為耳元末兵亂募集鄉民守廬州自稱萬戶尋率眾來歸從征渡江克復太平仍命為萬戶守之後從下江南諸州邑積有戰功轉征吳楚平定中原勲績益著累官指揮使陞右軍都督僉事

常權合肥人少好騎射喜兵法元季從軍淮西為列校上舉義兵權來歸從渡江拔采石克太平破敵

砦定南臺南徐毗陵取江右浙西征中原伐西蜀所向有功由

指揮陞都督僉事

朱文無為州人國初來歸從征討取太平克敵砦定

金陵常州江陰及江南諸郡歷有戰勲由帥職累官指揮守太倉威望甚著從平浙西積功陞後軍都督府都督僉事

馬雲國初從征取江南諸郡邑積有戰功陞任指揮從討中原克兗沂嶧濟汴梁河南河北臨清德州滄州直沽既而河西務通州皆下王師取元都命雲領兵守通州王師西取晉冀元兵來侵雲擊敗之威望甚著洪武四年七月上以遼東指揮劉益近遭事變而元臣納哈出等未附置定遼都衛指揮使司擇人為守乃以雲與葉旺為指揮使總轄遼東諸衛軍

馬以鎮遼疆

雲旺知遼東反側尚多由登萊渡海頃

高家奴

進至遼東完城備兵屯田興學政治一新

八年納哈出入寇雲知其將至命蓋州衛指揮吳立

至堅壁勿與戰及納哈出至見城中備禦嚴不敢攻

乃越蓋州城徑趨金州時金州城垣未完軍士寡少

指揮韋富王勝等聞虜至督勵士卒分守諸城門選

精銳登城以禦之納哈出裨將乃刺吾自恃其驍勇

率數百騎徑至城下挑戰城上發弩射之乃刺吾被

傷悶絕遂獲之虜勦大沮富等復縱兵出擊納哈出

不利慮援兵且至引兵退走以蓋州有備不敢經其

城乃由城南十里外沿柞河遁歸葉旺先為水城設

陷馬奔伏兵以待之戒士卒聞砲即豎旗雲於城中

亦立一大旗令定遼前衛指揮周鶚及吳立等各嚴

兵以候四顧寂無人已而虜兵至旺等俟其過城南

砲發伏起鼓動納哈出兵北奔盡為水城陷奔所厄

遂大潰雲於城中亦出兵追擊至將軍山畢栗河斬

獲虜人馬及凍死者甚衆納哈出僅以身免

上以勅勞之曰滄海之東遼為首疆中夏既寧斯必戍

守朕功未暇乃有蓋州諸將共意來庭固守其地以

待朕命於是整舟楫特命指揮馬雲葉旺等帥精兵

東渡深高金蓋遼陽以安黎庶北夷罔知天命屢害

生民舊歲冬十二月寇我金州指揮某某苦同士卒
戰在當先以寡敵衆遼蓋諸將深謀扼險惟爾遼東
諸將忠義干天得獲渠魁不負委託宜鎮方面遂陞
雲大都督府僉事十六年命同魏國公徐達永平侯
謝成鞏昌侯郭子興等巡撫北邊訓練士卒至冬十
月召還京後數年卒雲鎮遼左時兵戰未戢將士初
附乃能坐控貔虎威震邊陲定群心之搖兀破元將
之軼師蓋自其勇略兼備而施之有餘也故卒以守
禦功號稱名將云

葉旺國初從征討積有戰功陞授指揮以謀勇聞洪
武四年故元平章洪保保馬彥翬共謀殺遼東衛指
揮劉益故元右丞張良佐左丞房暉率部下擒彥翬
殺之保保走納哈出營遼東之衆因推良佐與暉權
衛事良佐遂以其事來聞且言本衛地方遐遠僻處
海隅肘腋之間皆為敵境其元臣平章高家奴固守
遼陽山寨知院哈刺張屯駐瀋陽古城開元則有元
相不花之兵金山則有大尉納哈出之衆彼此相依
互為聲援今洪保保逃往其營必有構兵之釁乞留
朝廷所遣斷事吳立鎮撫軍民上以立良佐暉俱
為遼東指揮僉事因置定遠都衛指揮使司以旺為

都指揮使與馬雲同往總轄遼東諸衛軍馬修治城池以鎮邊疆八年納哈出入寇旺知其將至與雲同設備命蓋州衛指揮嚴為城守納哈出不敢攻乃趨金州金州指揮章富等射殺其裨將乃刺吾納哈出懼而退走以蓋州有備不敢經其城乃由城南十里外沿柞河遁歸旺策其將退先引兵移柞河自連雲島至窟駝寨十餘里緣河壘冰為牆以水淋之經宿皆凝沍隱然如城嚴釘板於沙中設陷馬奔於平地伏兵以待之命老弱卷旗登兩山間戒以聞砲即豎旗已而虜兵至旺俟其過城南砲發伏兵四起兩山

旌旗蔽空鼓聲雷動矢石雨下納哈出倉皇北奔趨連雲島遇冰城馬不能前皆陷入窰中遂大潰雲亦出兵追殺甚衆旺等復乘勝逐至猪兒峪獲其士馬無算納哈出僅以身免事聞上嘉其忠義陞為都督僉事

以勅勞之

語詳馬雲傳

後二年

上復勅諭旺曰兵戍遼

海已有年矣雖曰農戰交脩其航海之運猶且連年未已近者靖海侯率舟師廣重載揚帆東往所運甚大昨晚忽聞納哈出正欲整兵來哨已被葉旺中途阻歸因此而料彼前數年但凡時值暑天胡人必不策馬南向今將盛暑彼有此舉大運既至當火速差

人星夜前去云以備禦然後上糧則無憂矣後復勅諭以備禦高麗之計凡數四旺在鎮號令整肅恩威兼濟克承教命以戰守功與焉雲齊名

陳方亮濠州定遠人居昌義鄉之鶴樓橋至正壬辰太祖舉義與兄方禮自本邑歸附甲午克滁州乙未克和州扈蹕渡江拔采石取太平溧陽溧水丙申克敵砦臺城鎮江等處皆有功俱授管軍總管尋下廣德攻宣州方禮既沒方亮獨以勞從征取江南諸郡邑轉戰吳楚戮力中原積功由帥職歷陞羽林右衛指揮使天下既定陞大都督府都督僉事

上親製誥文曰曩者天下兵久邇來既偃以息民朕嘗設都督府以總內外諸軍事其任官也非勲舊有功德者安能職焉爾陳方亮乃兄隨朕渡江有勞於前遺功在冊爾亦服勤足稱委令及從征有功職昭勇將軍羽林衛指揮使今特授奉國將軍僉大都督府事既承朕命夙夜毋怠以稱斯職爾惟懋哉十三年更定官制改右軍都督僉事率弟方煜初充帶刀舍人授旗手衛副千戶調寧夏再調烏撒衛

寧正初姓韋後復今姓字正卿鳳陽定遠人此據雲南舊志國志作有智謀膂力絕人國初從征定江左取吳楚

諸郡邑積有戰功累官指揮同知進討中原克山東
浚儀河南北臨清滄州通州元都皆預有功轉攻中
山保定洪武元年十一月傅友德自真定略平定州
正代守真定營壘二年從大將取西安鳳翔鞏昌四
月都督馮宗異既克臨洮降李思齊大將遂以正統
兵守之七月大軍圍慶陽王保保部將韓札兒攻破
原州欲為慶陽聲援大將與宗異等議擇人守衝要
遂調正守邠州八月慶陽既克大將自平涼將還京
師復以正還守臨洮十二月上大賞平定中原及
守禦功賜白金文幣二年從破擴廓帖木兒兵於定

西陞河州衛指揮使嘗言民間轉輸甚勞而布茶可
以易粟以茶布給軍士令自相貿易庶省西民之勞
詔從之正初至衛城邑空虛乃日夜撫循其民河州
遂為樂土 朝廷嘗賜爾書勞之 至是後 十四年從
傅友德沐英征雲南克普定曲靖及雲南府大理等
處俘獲甚衆分兵勦捕諸蠻悉平十五年三月列雲
南為郡邑分設軍衛以正為雲南都司都指揮使與
都指揮馮誠等同守其地九月雲南諸部皆叛蠻衆
二十餘萬攻城城中食少士卒且病正與馮誠極力
備禦賊不能克既而沐英統師勦之雲南復平二十

一年正月百夷

雲南志作平緬

叛結砦於馬龍他郎甸之摩

沙勃以犯邊正領兵擊破之斬首千五百級三月百

夷悉衆號三十萬戰象數百寇我定邊欲報摩沙勃

之役英選精銳數萬分為三隊前隊馮誠領之正領

其左都指揮湯昭領其右協力爭進將士鼓勇賊驅

象而前象皆被甲負戰樓挾大竹筒於兩旁置短鎗

其中乘象者取以擊刺陣既交我師炮銃齊發象皆

驚北萬衆攢箭射之正復擁士卒大呼突入其陣無

不一當百三軍奮而交擊賊大敗斬首三萬級俘萬

人生獲四十六象餘悉被矢如刺蝟以死渠帥刀斫

郎斯郎埋各中百矢殫象上餘黨走死百無一

是平緬歲入貢賦不復反八月東川蠻叛據巨

為砦其地重關疊嶽懸崖峭壁上下三百里

南兵與京樂大兵相為犄角討之賊已降復有貳志

悉誅平之二十二年二月越州酋阿資叛正徃征殺

火頭弄宗等五十九人俘男女數百獲馬牛羊皆以

千計阿資勢蹙令其母出降馮款兵計二十四年四

月阿資復叛英親帥師至其地斬獲殆盡阿資敗匿

萬山中英方分兵襲捕有旨命英回鎮雲南乃以

正為平羗將軍領兵討之阿資不復敢出遣其子請

降越境遂寧二十五年陞右軍都督府左都督徵還
二十八年五月傳 旨遣都督楊文廣西征進後數
年卒正憂國尚義保釐西土舌滇南幾十年黔寧每
有征討輒委任之無不成功備邊之略他將所不能
及云

耿忠鳳陽縣人長興侯之從弟號耿三舍國初歸附
歲癸巳從克定遠甲午克滁州乙未取和州渡江克
采石太平丙申定建康充叅隨舍人辛丑復安慶壬
寅下南昌癸卯戰鄱陽殲陳友諒甲辰授飛熊衛親
兵千戶攻討廬州調宣武衛乙巳四五月攻安陸襄

陽等處拔之十月調羽林衛丙午征克平子門濠州
及湖州舊館吳元年春陞吳興衛指揮僉事四月調
羽林左衛洪武元年陞建昌衛指揮使二年五月復
調羽林奉命往兩浙聽訟訪察官吏問民疾苦時紹
興三衢金華秋旱農事不登有司阻民告災忠疏聞
上怒提究官吏有罰三年自秦州南出一百八渡征克
興元其年往大同衛署事四年改大同衛指揮使五
年改太原衛九年統領鳳陽七軍一萬餘人陝西操
練屯種聽征十年左遷寧夏衛指揮僉事明年遇災
上勅諭之曰人居天地間凡智者必順脩天爵而勤於

入爵則禍無門而入福可得悠久也洪武十一年四月二十九日西安都司報寧夏地震且久時刻數之將過半日其所災者頽城壞屋於災異可謂甚矣爾耿忠乃功臣之子弟前者為不循軌度而有罰焉今降職勅守極邊所統者皆非慣戰之人亦非忠良之士為首帥者若恩威有歸著則必事乃成功業就若恩威謬有歸著則恐有變切防此等陰構外寇宜密察之方今天下大定爾所統軍內多有小巧智術者當秉心以正毋為所惑則無患矣故勅諭之十二年調松州衛十九年陞左軍都督府僉事二十年征進

沙漠抵遼東金州招元將納哈出亦降二十一年陞左叅將征捕魚兒海二十五年卒妻梅氏封夫人子琇為國賓尚清湘郡主

趙清一名應清濠州定遠人元末兵亂津集衆捍禦為義兵千戶歲癸巳上略定遠清附焉克萬戶甲午克滁州乙未克和州渡江取采石太平溧水丙申克南臺鎮江陞總管復破廣德攻宣州丁酉下常州陞元帥守禦為吳兵士誠每以兵侵軼輒擊退之甲辰克湖廣武昌滅偽漢拔荊州丙午陞蘄州衛指揮副使吳元年調虎賁右衛洪武元年閏七月授流官

誥從下中原二年從克陝西鳳翔鞏昌臨洮慶陽三年陞本衛指揮同知克定西安原誥與世襲四年伐蜀有功陞成州衛指揮使六月授流官誥八年陞武昌都衛都指揮又調燕山都衛後改北平都司十年八月授流官誥世襲指揮使二十年征慶州金山一迷河等處二十一年征捕魚兒海哈刺哈地以獲虜功七月二十四日陞驃騎將軍後軍都督府僉事授誥仍署北平都司事二十二年上口溫州征乃兒不花二十三年征迤北至上都察罕惱兒旋師二十四年三月賜誥榮其先世祖萬山父德俱贈驃騎將軍都督僉事祖妣繆氏妣馮氏俱贈夫人妻李氏贈夫人二十八年致仕永樂十四年卒于京師年八十八太宗皇帝遣官祭之曰爾昔事我

皇考克效勞勤茂著勲績高爵厚祿顯榮其身爰及晚

年致政于家壽考康強同樂太平詎期一旦溘然而

逝特茲遣祭用伸朕懷爾惟不昧尚克享焉朝廷祭文前後

凡六十五年歸葬定遠子九八授官者五曰璟洪武

二十九年襲皆運使尋陞驃騎將軍左軍都督僉事

無嗣曰琮府軍後衛指揮使曰均新州衛指揮使曰

瑛成都衛指揮使曰致承清衛指揮使俱世襲見任

曰儀曰鎮曰倫曰邦皆玄孫惟儀自府軍調福州左衛云

李勝定遠高義弟八世居沙于鋪業農父子皐鷲勇好兵勝亦少有勇略至正中江淮寇盜蠱起歲甲午太祖統義兵駐定遠子皐率勝於塔子山歸附是年從克滁州乙未閏正月克和州授子皐總管取張家堡六月扈從渡江拔采石乘勝舉太平溧陽溧水等處丙申二月擢元將中丞蠻子海牙水寨覆之三月攻破陳埜光營定有金陵克鎮江丹陽金壇六月取桐汭遂圍晉陵游擊橫林樂社自是從下江南諸州郡

所向成功庚子敗陳友諒於龍濟克復太平卒丑復安慶征九江遂友諒於武昌壬寅下南昌癸卯戰彭蠡甲辰陳理既降遂攻湖南江右丁未破蘇州執張士誠俱父子戮力子皐陞大河衛管軍正千戶從取中原洪武初卒勝襲父職益奮勇自效領兵從征廣東克潮州東莞廣州獲糧船數多剋邵叅政山寨復征廣西梧州貴州鬱林靖江二年調征陝西鳳翔秦隴鞏昌臨洮平涼慶陽所至奪旗陷陣預有勲烈旌賜白金文幣三年十一月陞指揮同知十二年征陝西凱還陞永昌衛指揮使後陞驍騎將軍左軍都督

僉事賜定遠田五頃一十三畝淮安店房三十六間
白壁塘一面鎮遠東三十年卒贈右都督歸葬定遠
子五人授官者二長通指揮陞右軍都督僉事次達
淮安衛指揮同知陞調院西都司都指揮鎮守洮州
孫英襲指揮使

李恪濠州人勇力過人至正壬辰淮西兵亂州縣簡
拔壯士為義兵以捍禦攻剽恪選為隊長癸巳八月
太祖在濠恪挺身來附乙未從克和州丙申五月渡江
充帳前黑趙都先鋒下副先鋒從克金壇丁酉克常
州攻寧國宣州江陰戊戌偽吳兵侵常州應援擊敗

之克復宜興征婺州己亥克諸暨攻紹興衢州庚子
征常熟州劉家港攻高郵是年五月偽漢陳友諒擁
重兵猝犯龍灣效死與戰友諒敗走復太平辛丑授
百戶守禦龍灣從擣九江偽都友諒奔武昌調守巢
縣癸卯張士誠兵寇安豐戰敗其將呂珍追奔數十
里七月友諒圍隆興從上親征鏖戰於鄱陽湖禁
江口友諒敗死還守巢縣九月陞千戶調鷹揚衛甲
辰援安豐克廬州乙巳克泰州海安坦等處丙午征
高郵克淮安安豐吳元年三月開設應天衛陞本衛
指揮僉事洪武元年三月授流官誥十二月征守陝

州二年克蒲州四月調守延安十月調綏德衛十二月征進察罕腦兒三年二月調延安衛十月復征察罕腦兒十一月詔授世襲四年中部縣等處叛賊猖獗統兵收捕之伍年春復盡剿其餘黨之遁匿山谷者以功陞本衛指揮同知六年閏十一月坐受僉事劉衡馬疋降本衛僉事七年十月復任本衛同知授流官詔九年冬調慶陽衛十年追捕寧夏叛逆達賊獲之與世襲二十年閏六月陞驃騎將軍後軍都督僉事明年十月授詔祖萬一父原四俱贈驃騎將軍僉都督府事祖母阮氏母洪氏俱贈夫人妻楚氏封

夫人

劉真廬州合肥人至正乙未六月王師渡江拔采石駐姑孰真於采石觀渡橋歸附從克溧水句容溧陽丙申破中丞水寨陳也先營南臺鎮江授總管攻常州丁酉克宣州江陰戊戌征湖州天目山獲常州又偕元帥謝再興趙德勝等率兵略石埭縣與陳友諒遇戰敗之禽真將錢清等及部卒四百餘人克婺州己亥攻紹興克衢州庚子攻高郵復太平辛丑征饒州湖廣壬寅下江西南昌吉安癸卯援安豐敗張士誠兵攻廬州虜友諒於鄱陽殲之於湖口甲辰克武

昌乙巳取安陸襄陽秦州海安瑛丙午充宿衛壯士
克舊館下湖州吳元年取無錫從征中原克沂州蓋
都濟南洪武元年克東昌棗州汴梁河南潼關潞州
平陽二年策應汴梁三年克應昌虹螺山十月授潞
州衛百戶四年陞太原護衛千戶八年陞興武衛指
揮僉事授世襲詔十一年調武德衛十二年調衛府
軍十四年從傅友德征南克普定盤江曲靖雲南十
五年克嵩明大理建昌征降烏蒙烏撒芒部十六年
取龍海六涼州馬龍羅雄小廣西調羽林左衛十七
年調陞金吾後衛指揮使十八年陞河南都司都指
揮一十年誥授世襲指揮使征金山一迷河招降納
哈出明年征捕魚兒海哈刺哈松林十月陞右軍都
督僉事階驃騎將軍十一月充總兵官督京軍陝西
追叛逃女直二十二年授都督誥承制岳州操練
垛軍一萬名二十三年統軍北征乃兒不花二十四
年正月勅自迤北往西創立甘肅城池操練軍馬及
調屯種八月總兵征西哈梅城九月攻破之生擒偽
王子別列怯幽王桑哥失里知院岳山獲金印一銀
印二及殺國公省院阿朵只等并大小首目所獲馬
疋悉給軍用二十七年率師征西番七月凱還十二

月遼東征勦女直部野人明年四月於隆安哨至肇
州多擒獲之過腦溫江分兵為三道逐至鎮兒口與
戰大敗其衆斬首及獲馬牛數多又逐北路野人拒
敵敗之皆遁去復引兵過江接應大軍殺退賊衆八
月奉勅充右叅將征廣西叛酋黃世鐵十月師至奉
議分軍勦向武都康等州貝充錦花等砦殺獲蠻衆
搜捕各處山洞於鎮安府撫安土官知府岑志綱就
調土兵抵龍英州抄截要路分攻都控已籠納龍雷
西遙等山砦破之斬世鐵梟首奉議州市獲銅印及
餘衆首級耳記人馬送官又攻破山砦曰谷龍更州

連弄影擊益等處殺土官黃嗣彌亦梟以示衆又征
南丹州土官莫金遁殺其子萬和生擒莫應臺追至
永州分力砦斬莫金遂城南丹至慶遠府分勦大藤
峽江南岩大宁等地徭賊擒戮其叛首陸一作公光
等餘悉撫定之二十九年春班師三十年秋徂冬征
地青潭迷木瓜矮及大雲黃土石塘池南等洞擒土
官楊百萬楊十萬等首三十一年哨龍婆臘枷杓文
坡諸洞俱破之四年賜鈔若干錠尋往北平脩懷來
衛城池改左軍都督會事三十五年陞左都督鎮遼
東永樂元年卒子男俊襲金吾後衛指揮使女長冊

太宗皇帝昭順德妃次伊王妃孫男勳襲父職獻楚府
儀賓女蜀世子妃曾孫男瑄襲父職女寧府宜春王
妃

皇明開國功臣錄卷十八

定遠黃金

俞廷玉 許瑛 葉琛 趙忠 王鼎 朱文選

李實 郭某 宋國興 劉友仁 夏德瀾 曾封

朱文剛 李夢真 徐明 曾萬中 劉齊 朱華

程國勝 汪清 楊興 賀興隆 陳海 王國寶

周迪 張耀 平定 龐裡 李傑 朱顯憲

俞通淵 曾貴 狄崇 劉廣 鄧瑜 劉林

俞廷玉本濠州蒲塘人壬元戊寅遷居巢至壬壬辰
江淮兵擾彭祖以妖惑衆人多應之廷玉從其部屬

李普勝甲午彭事解廷玉與子通海通源通淵泊舟
巢湖結廬永安等聯絡為水寨以捍寇亂妖黨左君
弼據廬州恒出兵窘之諸將鬱鬱不得志乙未之春
上駐蹕和陽廷玉以書納款備述君弼梗道之故未幾
上親至巢湖援之而出適中丞蠻子海牙擁兵阻河口
雙刀趙屯黃墩陰畜異志廷玉傾心共謀委身翼衛
戰退中丞兵既抵和陽遂於裕溪河鱗魚洲等處攻
寨有功授萬戶扈從渡江拔采石取太平擢管軍總
管攻邊湖水陽克小花圩溧陽顧成湖民寨太平河
三汊口丙申縱火焚敗中丞水寨破陳兆先陸寨三
月定臺城克鎮江陞元帥取丹陽丁酉克寧國長鎗
軍戊戌援池州縱陽己亥四月克柵江營獲趙牛兒
等船復池州擒偽元帥洪鈞等陞僉樞密院事九月
上命廷玉總領戰船軍士攻取安慶沒于陣贈龍虎將
軍上護軍同知樞密院事追封河間郡公通海通源
通淵俱別有傳

許瑗字東夫饒之樂平人讀書聰明強記至正中兩
以易經舉於鄉皆第一及會試不第放浪吳越間每
醉輒大言自負人未有知之者歲戊戌十二月
上取婺州己亥正月猶駐師焉瑗以儒士進謁因言于

上曰方今元祚垂盡四方鼎沸豪傑材勇之士勢不能獨安夫有雄略者乃可馭雄材有奇識者然後能知奇士閣下欲掃除僭亂平定天下非攬收英雄難以成功 上曰今四方紛擾民困塗炭予用英雄有如飢渴方廣覽羣議博收衆策共成康濟之功瑗曰如此實帝王之道天下不難定也 上喜授博士留帷

幄中參預議謀以太平為股肱郡遂命為知府瑗至厲士卒修城池撫黎庶庚子閏五月丙辰偽漢陳友諒率舟師攻太平守將樞密院花雲與瑗等以兵三千拒戰友諒攻城三日不下引巨舟泊城西南士

卒緣舟尾攀堞而登城遂陷瑗被執罵賊不屈死之

上嘉其忠追封高陽郡侯立忠臣祠于太平

在建陽命衛西

有司歲時祭享

葉琛處州麗水人博學多才與同郡劉基章溢抗名

元季兵亂從叅政石抹宜孫討寇有功陞行省元帥

上疏下婺州延見宋濂因聞琛與基溢皆國士也已亥

十一月胡大海克處州琛避走建寧既而復還麗水

上特遣使以幣聘之庚子三月戊子與基溢濂四人同

至建康處之禮賢館講明經史訪論治道時有裨益

上嘗問左司郎中陶安四人者何如安對曰臣謀略不

及劉基學問不及宋濂治民之才不如章溢葉琛擢琛為管田司僉事壬寅正月上帥師至龍興守臣平章祝宗同僉康泰以城降改龍興為洪都府以琛知府事命宗泰從徐達征武昌

上還建康宗泰中途叛回據洪都琛迎戰死于市事聞上嘉其忠義追封南陽郡侯命有司立廟城中在五桂坊西

歲時祭之詳見豫章忠臣廟記

趙忠國初從征渡江克取太平溧陽等郡邑有功授總管丙申大破中丞寨於江面覆方山營進克集慶上駐蹕集慶以太平為股肱重郡命忠為興國軍元帥

守之未幾擢興國分院判丁酉五月常遇春遣忠與元帥王敬祖攻池州之青陽縣蘄州徐壽輝將趙普勝出兵來拒敬祖以十餘騎衝其陣陣亂忠麾眾乘勝疾擊遂破之克其寨是年十月從常遇春攻池州破其北門入城斬元帥洪某禽其副將得糧幾萬石陞行樞密院判鎮池州戊戌四月己巳壽輝平章陳友諒遣普勝自樞陽來寇忠出禦之戰沒于陣養子王鼎襲忠職

王鼎儀真人趙忠之養子忠國初渡江從征有功累授行樞密院判鎮池州趙普勝寇池州忠出戰沒于

陣鼎襲其職復姓王守太
平庚子閏五月丙辰偽漢
陳友諒以重兵猝犯太平
時城中守兵止三千鼎與
守將花雲率以拒戰友諒
攻城三日不下乃引巨舟
泊城西南士卒緣舟尾攀
堞而登城遂陷鼎被執罵
賊不屈遂死之 朝廷聞
其忠追封太原郡侯立志
臣祠于太平命有司歲時
祭享

朱文遜 上卷子也國初從
定江左郡邑累有戰功擢
任元帥已亥八月 上以無
為州逼近肘腋未附命文
遜取之文遜與元帥秦友諒
率兵力攻遂克其城尋命
守太平庚子閏五月丙辰
朔偽漢陳友諒擁

舟師數十萬來寇守將花
雲與文遜以兵三千拒戰
文遜死之

李實滁州清流人祖萬一
祖妣羅氏父覺成贈宣威
將軍僉驍騎左衛指揮母
王氏封德人當元之季天
下大亂歲乙未 上駐師和
州覺成與實俱來歸備行
伍爰自渡江連歲用兵以
取江東之地實年甫弱冠
有膽氣多膂力每戰輒當
前鋒揮戈舞槊萬騎辟易
由是見知於開平王常遇
春選隸麾下辛丑始充總
旗甲辰春陞百夫長是年
從遇春取廬州安豐定安
陸襄陽諸郡丙午三師征
浙西敗偽吳兵於舊館

次年秋克姑蘇擒張士誠皆預有功洪武元年戊申
從大將軍取山東定河南旌虜所指中原悉平二年
師還以功進武德將軍神策衛千戶復從遇春北征
沙漠東克永平特元丞相也速等據紅羅山一作虹為
壘未下實不避矢石率衆先登遂拔其柵事聞

上特賜白金文幣五年轉武德衛千戶八年陞宣威將
軍僉虎賁左衛親軍指揮事詔授世襲十二年詔西
平侯沐英往平西羌實領騎兵以從三月九日與虜
騎相遇於土門峽大戰數十合虜少却我軍張翼出
其後而以精騎蹂之虜大敗實擁槊躍馬乘勝深入

俄為流矢所中流血被甲裹創復戰勇氣益倍會日
暮收兵還翌日創甚輿至華昌而沒年四十一訃聞
上為之嗟悼詔追贈奉國將軍護軍僉大都督府事命
有司以其柩歸所過郡邑致祭填道及至

上為擇葬地於鍾山草堂川先是覺成從征姑蘇以沒
翟厓城南聚寶山至是命遷以同葬寔以五月某日
上親臨祭凡喪事所須皆官給之一不以煩其家明年
上追憫實死事非有文字稱述無以光揚勇烈激勸忠
義特勅禮部侍郎劉崧撰神道碑示天下後世於戲
皇明以神武定天下凡開國元勳碩臣大將受廟筭而

樹偉績者不可殫紀其偏裨將校被堅執銳以奔走
先後者亦各有其人至於敵王所愾率先犯難殞身
鋒鏑而不顧英姿義氣雖死猶生如李將軍者則豈
可多得哉嘗觀古昔人臣有勲勞於國家則必銘諸
鼎彛紀于太常用永世勸將軍以死報國

聖祖以金石旌之君臣上下之義於斯至矣妻郭氏封
德人子三人長趙保次玄關次羅兒

郭某定遠人滁陽王長子國初從取和州乙未三月
王既卒濠州舊帥孫德崖欲統其軍上代某辨之
得握父兵從征討時汝穎人杜遵道等奉韓林兒為

帝檄某為都元帥渡江取姑孰禦敵兵皆預有功未
幾攻集慶路戰沒

宋國興定遠人元帥朝用之子元季壬辰江淮兵擾
上舉義國興隨父來歸預參議謀是歲從克濠州復征
賈魯敗之以功授萬戶甲午從張天祐克五河泗州
盱眙等處進總管乙未從上克和州渡江下采石

太平

誅

其誤審矣表少元帥宋某為宋晟則可通從克深陽

進攻南臺戰沒後附祭功臣廟第晨以開國功任都督別有傳

劉友仁廬州合肥人少慷慨有大志元末兵亂與弟謙乘時奮起謙率鄉兵集合肥友仁移淮之山陽亦集義旅以觀時變會

上起兵豪傑趨附遂與弟俱來歸隸長鎗謝元帥麾下歲丁酉叅隨胡大海取徽州克黟縣祁門建德等處招到元帥葉公權馬國寶汪君信羅友賢侯邦佐等復從攻池州上奇其功擢友仁中軍左元帥府右副元帥總制仁安翼守禦太平縣戊戌四月己巳徐

壽輝平章陳友諒遣其將趙普勝自樅陽寇池州友仁率兵援之戰沒于陣己亥春上命謙襲其職後上追悼友仁死事命附祭功臣廟

夏德潤國初從定江左郡邑積有戰功擢任元帥領兵守草平鎮歲辛丑三月偽漢陳友諒將李明道寇信州聞胡大海在浙東懼其來援乃遣兵據草平以遏我師德潤出兵爭之戰死

曾封國初歲己亥十一月王師克慶州七邑分官守治之以封為慶元知縣庚子六月壬子元慶州舊守將石抹宜孫收士卒欲復慶州遂攻慶元討率兵與

戰被執不屈遇害

朱文剛 上養子也賜姓朱小字柴舍國初從定江左有功授元帥己亥十一月王師克處州七邑皆下上以其郡多反側命院判耿再成與文剛同守之政治一新軍民悅服壬寅二月七日處州苗帥賀仁德李祐之謀叛再成與文剛聞變急欲收兵殺賊不及馬上以劔斫賊大罵之賀李等遂殺再成文剛亦遇害贈鎮國將軍附祭功臣廟

李夢庚國初從起兵即侍帷幄掌簿書參預謀議渡江取姑孰定金陵皆在行間掌軍機文字甚見委任丙申七月置江南行中書省設省屬以夢庚為左司郎中與郭景祥分司署事職記兵政後二年加秩為叅軍己亥謝再興從克婺州回

上命再興守諸暨再興以心腹人左總兵廖萬戶潛往杭州私易物貨 上怒泄國事殺左廖二人召再興至京聽宣諭乃命夢庚往諸暨節制軍事遣再興回聽調再興既回愧無權勢又受制於人心懷怨憾因謀叛遂執夢庚等以諸暨全城軍馬赴紹興降于張士誠夢庚由是遇害洪武元年冬 上命築壇於雞籠山致祭功臣胡大海等以文臣沒於王事者夢庚

及孫炎王愷等附祭又曰隨我渡江文官掌簿書及軍機文字勤勞一十五年如李夢庚侯元善等與他子孫世襲所鎮撫

徐明廬州合肥人國初為管軍日戶壬寅從守洪都癸卯五月丙子陳友諒攻洪都之新城門從指揮薛顯開門突戰被執死之明有膽略善脩飾軍中號為胎裏謊當圍城之日嘗出劫友諒營獲其良馬以歸友諒陰設陷穽數臨城誘戰是日明且醉躍馬出城射賊賊走明追之墮穽中賊拘取去誘之降不從尋殺之後追封合肥縣男配享洪都忠臣廟以其子為

指揮

曾萬中吉水人自幼穎異元季為千夫長江右大亂萬中與弟粹中保障吉安俱為土軍元帥上破九江陳友

諒走武昌上遂至龍興江右諸郡皆附萬中兄弟以吉安來歸上嘉之命萬中為都元帥粹中為行軍指揮俾還守吉安是時

江右諸郡往往觀望狐疑未決癸卯三月吉安臨江

撫州三城叛萬中走京師乞援授萬中江西行省叅知政事粹中親軍指揮使領兵討平之守禦如故五月友諒圍洪都遣知院蔣必勝饒鼎臣等復陷吉安時李明道與萬中兄弟不協明道因潛通必勝約其

來敵兵至城下明道舉火而應開西門納之城由是
復陷萬中迎戰被殺粹中已走經其仇家黃如潤里
中為所執送鼎臣殺之

國志云兄弟皆戰死

劉齊國初從征有功命為江西行省叅政守吉安時
同守者有曾萬中兄弟及李明道癸卯五月陳友諒
圍洪都遣其將知院蔣必勝饒鼎臣等攻吉安陷之
時明道與萬中兄弟不協明道因潛通必勝約其來
敵兵至城下明道舉火而應開西門納之城遂陷齊
被執必勝脅降之齊不屈送友諒所友諒以齊徇洪
都城下殺之

朱華國初為吉安知府癸卯五月陳友諒遣知院蔣
必勝饒鼎臣攻陷吉安時李明道與曾萬中不協因
潛通必勝約其來敵兵至城下明道舉火而應開西
門納之城陷執華必勝脅降之華不屈送友諒所友
諒以華與叅政劉齊徇于洪都城下

程國勝字昌佐徽之休寧人國初以武功授帳前總
判親兵萬戶癸卯夏偽漢陳友諒罄舉國兵自武昌
來圍洪都七月上率將士親征國勝從行友諒解
圍與王師遇於鄱陽大戰於康郎山國勝誓滅賊奮
不顧身遂戰沒後友諒敗死上還建康追念國勝

捐軀徇國效忠死義贈明威將軍上騎都尉帳前上

萬戶封安定郡伯仍建忠臣祠於康山設象其中命

有司歲時祭之汪廣洋作哀親故帳前總判親兵上

從妹婿也於是以忠死於康山又明年詔贈官加爵賜

廟食焉公於是無憾矣顧康山之後廣洋在行

追悼骨肉情曷能已因次往年觀兵應制詩讀賦

哀輓一章蓋以快獨夫之滅而慰忠義之魂於九泉

也黑雲如陣壓綠幢血戰銷沉一代雄鐵馬降靈忠

憤在金貂追爵聖恩隆張巡節重凌煙上紀信功

高汗竹中生氣尚疑公不死巨夫終古作長虹

汪清泗州盱眙人尚太原長公主始以親兵首目從

上征討歲戊戌四月領軍取通州破黃橋攻高郵等處

十月克復宜興十二月攻杭州庚子五月策應宜興

援常州辛丑克江西九江湖廣黃梅廣濟壬寅復安

慶授管軍百戶癸卯三月援安豐敗吳將呂珍兵四

月攻廬州久而將下適陳友諒重兵圍洪都七月從

上親征友諒解圍出鄱陽與王師遇大戰于康郎山清

效死斬擊沒于陣寔是月二十一日也後友諒敗死

上還建康追念清委身敵愾忠義昭析特舉崇報贈武
節將軍驍騎尉管軍上千戶封盱眙縣子建忠臣祠
於康山設象其中命有司歲時祭之洪武元年正月
上即帝位封駙馬都尉子二人長致淵羽林左衛指揮
僉事調燕山中護衛次致澄錦衣衛鎮撫陞洛陽中

護衛指揮僉事孫寧景美祖曾孫春玉環

揚興和州含山人勇毅有大志至正乙未巢縣歸附

上壯其材武授管軍千戶六月扈從渡江拔采石取太

平時元兵侵軼上駐師守禦興取溧水溧陽皆先

登陞萬戶丙申二月破敵寨三月攻克南臺乘勝取

鎮江陞管軍總管從圍常州丁酉三月克之十月進

克池州戊戌四月取通州辛丑秋從擣江州偽都陳

友諒奔武昌癸卯四月攻廬州七月從上復征友

諒大戰于鄱陽興偕諸將擊之以死自效遂沒于陣

子文有征伐功歷任左軍左都督為開國名將孫曾

以下世襲南京羽林右衛指揮使

賀興隆國初從征有功甲辰武昌既平陞授湖廣行

省叅政俾征未附州郡克寶慶與賊周文貴戰歿有

詔褒贈立祠祀之命有司歲以六月八日致祭

陳海國初以武功擢任元帥與曾萬中同守吉安癸

卯三月吉安土兵糾合賊兵作亂陷城海等討平之

五月偽漢陳友諒圍南昌遣其知院蔣必勝饒鼎臣

等復陷吉安時李明道與曾萬中兄弟不協明道因

潛通必勝約其來敵兵至城下明道舉火而應開西

門納之城由是復陷海與萬中迎戰俱被殺

王國寶國初從克江南郡邑積有戰功歷任指揮歲
丙午秋八月伐張士誠克舊館及湖州冬十一月進
攻蘇州與敵戰歿丁未秋九月平吳師還

上召諸將於戟門封賞有差諭諸將曰自兵興以來天
下豪傑紛起予將兵渡江賴上天之靈將士之力拓
地開疆削平敵國如陳友諒兵衆地大已先摧滅張
士誠兵強積富今亦就擒非爾將士用命何以致此
今論功行賞以報勞勤如王國寶等歿于王事而不
得與吾甚惜之命築壇於雞籠山祭故功臣以國寶
等附祭

周迪國初從取江南征湖廣皆有功授寶慶衛百戶
歲丁未冬從平章楊璟征廣西洪武元年正月進擊
永州圍之守將鄧祖勝戰歿元兵自廣西來援駐東
鄉倚湘水列七營軍勢甚盛景遣鎮撫呂琛指揮袁
子明及迪等擊之迪戰死 上聞之命禮部議封贈
令有司祭之

張耀壽州人元季大亂從義兵元帥陳瑄先領兵屯
建康之殷巷天兵克殷巷耀如歸附命與諸將子同
入侍衛累立戰功陞神策衛指揮使洪武初從李文
忠北征與胡虜戰沒賜葬於江寧縣獅子塘

平定國初從取江南及征中原皆有功歷任指揮同知洪武元年八月元都既克詔大將軍達置燕山等六衛以守禦北平以定為燕山右衛指揮使二年三月從常遇春征至錦川追江文清獲人口馬牛車輛以數千計三年從大將軍北伐殺虜有功四月復率兵次于三不刺川遇胡兵力戰沒于五郎口

龐裡國初以武功累官指揮僉事從征中原山東河南等處所向克捷燕都既定陞大興左衛指揮同知守禦北平洪武三年從大將征虜四月甲午與都督孫興祖及燕山右衛指揮于定率兵次于三不刺川

遇胡兵力戰皆沒于五郎口

李傑壽州霍丘縣丁塔鄉十三都人國初從取江東轉戰吳楚積有勲績任廣威將軍廣武衛指揮僉事歲丁未從征中原克山東等處州郡洪武元年取汴梁河洛北伐通州進拔元都皆預有功是年九月常遇春等下保定留傑守之未幾調北征陣亡事聞贈鎮國上將軍都指揮使父永中贈宣威將軍僉親軍指揮事都尉追封隴西郡伯母董氏封隴西郡君妻茅氏封太淑人子男二長諒昭勇將軍神策衛指揮使次忠明威將軍旗手衛指揮僉事俱世襲女一為

皇淑妃孫三人曰涇曰濤曰溟惟我

聖祖有天下凡職兵死事之臣必申恤典所以慰忠魂
於九京厲臣節於百世也如傑者萬里胡沙捐軀徇
節既贈其身又祭及其父母妻子恤典至矣益其英
靈烈爽此誠少慰以是勸忠其大有關於世教哉

朱顯忠秦州如皋人嘗為張士誠將守松江國初丙
午年冬平章俞通海兵臨太倉崑山嘉定等處皆附
顯忠聞風灼知天命以城降從征有功授濠梁衛指
揮僉事洪武四年從潁川侯傅友德克文州遂留守
之未幾偽夏平章丁世真誘合番寇數萬來攻顯忠

盡外援不至部下皆曰與其陷死地孰若出城求生
路乎顯忠厲聲曰為將守城城存與存城亡與亡豈
有求活將軍耶詰旦世真攻圍益急顯忠悉出兵東
門拒戰世真復攻西門日且暮顯忠被傷累瘡決戰
力不支城破為亂兵所殺事聞遣使祭之贈鎮國將
軍都指揮使仍厚恤其家自古死難之臣皆以見道
分明甘心報國無所為而為故稱忠義若顯忠守土
被圍當食盡援絕部下咸有他圖而顯忠一志不變
知有城守而不知有其身非見道分明無所為而為

能若是耶事去力窮卒死於義嗚呼顯忠死矣千古之下讀其三數言猶如不凜有生氣

俞通淵集縣人河間縣公廷玉季子通海通源弟也至正壬辰江淮兵起通淵隨父兄集義旅保鄉曲甲午入巢湖結寨乙未五月父子共以舟師應

太祖渡江廷玉征安慶戰沒通海以開國大功位平章卒封豫國公改封魏國通源以定中原功封南安侯洪武七年十月通淵充參侍舍人八年正月同武昌護衛蔡指揮等詣北平從徐魏公操練士馬聽調四月召回鳳陽管領無糧人戶屯田九年正月除散騎

舍人二月從宋國公征陝西十一年七月授成都左衛鎮撫從總兵丁大夫玉征四川松疊潘等州十二年正月克平之因遣出哨中途先回謫松州衛聽調十三年正月授留守中衛所鎮撫五月陞本衛試指揮僉事十二月調青州左衛僉事十五年調僉定遠右衛十八年九月陞中軍都督僉事十九年二月詔授驃騎將軍改僉左軍都督府事二十年邊北征進統領薊州遵化等衛官軍饋運大軍糧儲二十一年四月大軍征哈剌哈捕魚兒海調統府軍左等衛兵前哨至達官六帥哈刺章營招來本營兵達官鈕璘

等八營人口馬駝牛羊及擒殺復叛逆官同僉哈刺帖木兒等所獲人口等物悉送總成所又偕都督何福率師哨至曲律蓮河招降平章阿晚木等獲人口馬駝數多八月回京賜白金二百兩彩段四疋鈔五百貫二十二年六月承制荊州等處訓練荊州等衛士卒兼閱民丁集軍一萬一千五十名二十三年五月總統各衛兵并運糧二十萬往永新上下接應征安福之師十月乃旋仍蒞本府事十一月率達軍征都勻二十四年二月克平之三月率各衛軍從總兵西平侯征勦龍海賊蠻兵斬首四十五級四月脩立龍窠堡六月領永寧畢節等軍前哨生擒蠻人二十一名獲蕎麥五千石運貯龍窠八月駐普定操練九月率普定等軍征龍場蠻獲稻七千餘石運龍場堡儲之十二月回貴州統辰沅軍同茆都督征古州諸蠻洞二十五年正月十七日克銀賴洞十九日克參門合水二十七日克古州明日克蒲洞二月三日克銅鑼蠻六日復統辰沅及寶慶諸軍勦龍里四寨次日克洒洞龍圖灌洞二十一日克赤沙二十二日至上黃立堡守禦三十日克透洞洪州三月一日克楊潮三達立堡守禦十一日克龍寨兩洞獲蠻賊八

百餘人家屬數千五月自五開回至京復有鈔段白金之賜六月

上以通淵屢立戰功克績文兄遺烈授開國輔運推誠宣力武臣榮祿大夫柱國封越雋侯食祿二千五百石誥授世襲尋總兵討建昌叛逆指揮月魯帖木兒禽之遂於印部州築城建越雋衛二十六年夏召回上念其勞欲優逸之諭之曰汝家所置第已成錫汝以家還鄉居之三十二年七月有旨遣艾端起在開越雋侯授豹韜衛指揮使八月領軍北征二十三年四月于白溝河陣亡朝廷哀悼勅葬南門外

寶山號公墓傍賜神策衛老軍劉海等守之妻廖氏封侯夫人子三人長翊三十一年卒次靖三十二年襲豹韜衛指揮使卒于官次端幼三十四年賜錦衣衛優給全俸未幾亦卒自古立功盡節之臣或父子焉同出或兄弟焉並見者有之矣求其父子兄弟三四疊興皆能戮力建勲效忠死義如俞氏一門則未之多見當趙普勝之肆強而廷玉犯難當偽吳之毒亡而通海死忠通源保終於百戰之餘通淵全節於廢起之日雖所立有等差然皆生則有功死則無愧壯國家之元氣而可為萬世臣鑒者也嗚呼是豈可

易得哉

曾貴國初以武功為指揮僉事洪武十年征進松茂
威疊數著戰績十一年置松潘衛鎮禦其地後征建
昌清水江蠻賊中流矢卒贈鎮國將軍都指揮同知
遣官致祭其在邊威服番夷有恩信及人番酋至今
仍稱曾將軍云

狄崇國初從征有功洪武中任濟寧左衛指揮使開
設衙門創造城池尋陞廣東都指揮使未幾特命統
兵鎮守雲南沒於王事令有司送葬濟寧遣行人諭
祭刻石墓前

劉廣黃州羅田人洪武中以軍功為指揮僉事守永
平有膽略善用雙刀嘗病且殆語人曰吾當臨陣死
王事安能居牖下死兒女手乎後胡騎入寇廣率四
十餘騎與遇於城北力戰死之事聞遣使護喪至京
賜其家楮幣以葬

鄧瑜國初有武功洪武間濟南衛指揮同知將率軍
士從征囑其妻胡氏曰我為人臣當盡死節汝為人
婦能盡貞節乎胡氏許諾瑜竟歿于陣胡氏亦守節
不渝詔旌表其門

劉林國初以武功任涼州衛百戶洪武中土官也先

帖木兒等逃叛攻掠涼州林擊賊至城西實融臺在涼

州衛治西北五里相傳漢寶駝所乘力戰而歿事聞

上嘉其忠勇遣祭丁臺下人皆重其忠節因改名其臺

為劉林臺

已上三十六人皆死事之臣

皇明開國功臣錄卷十九

定遠黃金

豫章忠臣廟

趙德勝 李繼先 劉齊 許圭

趙國昭 朱潛 牛海龍 張子明

張德山 徐明 夏茂成 葉思成

葉琛 趙天麟

國初歲壬寅三月南昌降將祝宗等復叛癸卯夏偽

漢陳友諒圍南昌文武諸臣與之戰死者凡十四人

朝廷追念忠義命有司立廟南昌城中塑像歲時祀之

趙德勝前有傳

李繼先任樞密判官守洪都友諒攻城急繼先出戰被掠殞敵中贈隴西郡侯

劉齊任右副指揮使領兵取吉安友諒軍至畧城齊力戰沒于陣贈彭城郡侯

許圭任統軍元帥領兵取吉安友諒軍至畧城圭力戰歿于陣贈高陽郡侯

趙國昭記作旺任左副元帥守洪都友諒攻城急國昭引兵燒賊艦追者至投橋而死贈天水郡侯

朱潛任右翼同知元帥領兵取吉安友諒軍至畧城

潛力戰沒于陣贈未詳

牛海龍任左翼元帥副使守洪都友諒攻城急海龍突圍出戰中矢死贈隴西郡伯

張子明前有傳餘詳廟記

張德山軍士勇敢善戰友諒圍洪都德山以夜半潛出城焚賊舟事覺遇害贈千戶

徐明前有傳

夏茂成軍士勇敢善戰友諒圍洪都茂成守城樓當賊衝中飛砲而死贈總管

葉記作葉思成任江西行省都事壬寅四月祝宗康秦

內叛據南島思成遯戰死于市贈未聞

葉琛前有傳

趙天麟任臨江府同知友諒圍洪都遣知院蔣必勝
攻破臨江天麟被執必勝脅降之不屈送友諒所友
諒以天麟徇于洪都城下殺之贈天水郡伯

豫章忠臣廟記

胡儼

豫章人國子祭酒

帝王之興必有佐命之臣際風雲之會戡定禍亂措
天下於乂安至於臨危赴急奮威敵愾蹈白刃如即
甘寢殺身以成仁嬰城而固守者非有英雄之姿秉
豪傑之志烏能若是之烈哉此豫章忠臣功顯當時

名垂後世廟食無窮炳炳烺烺與國咸休有非行陳
之間積功累勲之可比矣初元政不綱群雄並起我
太祖高皇帝握乾符而興淮甸一時龍虎鷹揚之士雲
合景從翦除群盜救民於水火之中遂建都金陵時
偽漢陳友諒率水軍乘風一夕奄至江西元司徒道
重平章火你赤皆遁去城遂陷友諒以偽丞相胡廷
美守之辛丑秋王師至九江將壓境廷美懼遂遣人
詣軍門納款明年春二師至江西命叅政鄧愈留守
未幾廷美裨將祝宗亦秦作亂愈走金陵復命右丞
徐達自沌口還師討之於是以太文正為大都督

統諸將鎮守文正者

太祖之從子也友諒聞之乃悉衆以巨艦攻圍城自癸卯夏至秋凡八十五日文正命諸將分城拒守友諒屢攻不克時則有若平章趙德勝者晝夜巡城為流矢中左脅而卒右副指揮使劉齊右翼元帥同知朱潛統君元帥許圭三人者領兵取吉安友諒軍至畧城齊等力戰俱歿于陣左翼元帥副使牛海龍友諒攻城急海龍突圍出戰亦中矢死樞密判官李繼先左副元帥趙國旺俱以危急李出戰被掠殞敵中趙引兵燒賊艦追者至投橋而死洪都府知府葉琛臨

江府同知趙天麟江西行省都事萬思誠康祝之變琛思誠逃戰死於市天麟守臨江友諒軍攻臨江城破天麟死之管軍百戶徐明當圍城之日友諒陰設陷阱數臨城誘戰明乘醉躍馬出城射賊賊走明追之墮阱中賊鈎取去誘之降不從尋殺之張子明者張元帥之子代父為間使走金陵求援兵還至吳城被執友諒強授以萬戶令其徇城給衆降子明佯許之至城下望城大呼曰我張大會已見主上令諸公堅守救兵且至我必死幸見諸公賊怒攢槊刺之死城下又若張德山夏茂成二人者皆軍士性勇敢善

戰德山以夜半潛出城焚賊舟事覺遂遇害茂成守
城樓當賊衝中飛砲而死凡十四人者其事大略如
此及友諒滅

上念諸將忠義命有司立廟城中歲時祀之贈德勝梁
國公齊彭城郡侯海龍隴西郡伯繼先隴西郡侯圭
高陽郡侯國旺天水郡侯琛南陽郡侯天麟天水郡
伯明合肥縣男茂成總管德山千戶子明初贈武毅
將軍飛騎尉千戶後加贈忠節侯其告詞曰身雖被
執猶盡忠言死不易志古今所難所以崇德報功也
獨思成之贈未聞豈禮官一時或遺耶今都指揮同

知湯節每與同列行事祠下慨然欲表章之俾有聞
於世屬記於余嘗聞諸長者曰昔王師之覺友諒順
天應人無不一當百鄱陽之戰過於赤壁戮鯨鯢而
殄豺虎如摧枯拉朽散亡之卒投戈請命此固神謨
廟略之有定然亦豫章之守有以老其師挫其銳遂
致摧敗零落而不可枝梧也此處可與朱文正傳互觀又嘗預聞
國史頗知其事故不辭而記之

康山忠臣廟

韓成

宋貴

王勝

陳兆先

李信

姜潤

丁普郎

王鳳顯

程國勝

后明

常惟德

王德

王咬住

朱鼎

張志雄

李志高

汪清

常德勝

鄭興

袁華

昌文貴

俞昶

陳冲

王喜先

汪澤

丁宇

逯德山

羅世榮

史德勝

徐公輔

劉義

陳弼

裴軫

王理

王仁

曹信

國初歲癸卯四月偽漢陳友諒以重兵自武昌來圍洪都日久守將大都督朱文正遣使告急請援七月上親帥諸名將統舟師二十萬往討之友諒解圍東出

鄱陽湖以迎我師遇于康郎山歷戊子己丑庚寅等日連與大戰是時諸臣皆奮擊其間多效死者友諒既滅上還建康甲辰四月

上謂中書省臣曰崇德報功國之大典自古兵爭忠臣烈士以身殉國英風義氣雖死猶生予與陳友諒戰於鄱陽將臣效忠死節昭昭可數有功不報何以慰死者之心而激生者之志哉爾中書其議行之於是中書省以死事之臣三十六人列進遂封贈勳爵有差建忠臣祠於康郎山設像其中命有司歲時祭之韓成前有時

宋貴任水軍元帥府統軍元帥贈安遠大將軍輕車都尉封京兆郡侯

王勝任元帥府右副元帥贈懷遠大將軍輕車都尉封太原郡侯

陳兆先元將也先之子代父屯營方山歲丙申三月上破方山營禽兆先釋之用為元帥從征丁酉四月克寧國縣及宣州六月取江陰州戊戌十月策應宜興十二月從克婺州己亥正月拔諸暨攻紹興庚子五月擊敗陳友諒於龍灣復太平守禦辛丑八月征安慶北門殺敵進破江州壬寅從下南昌至是戰後贈

安遠大將軍輕車都尉太平興國翼元帥府統軍元帥封穎上郡侯

李信任秦淮翼元帥府右副元帥贈懷遠大將軍輕車都尉封隴西郡侯

姜潤任驍騎衛管軍上戶贈武節將軍封定遠縣子

丁普郎初為陳友諒將守小孤辛丑八月王師征友諒次小孤普郎迎降仍用為將從征有功授行樞密院同知至是七月己丑與友諒戰死身被十餘劒首脫猶執兵若戰狀植立舟中不仆贈輔國上將軍護

軍封濟陽郡公

王鳳顯任驍騎衛管軍千戶贈武節將軍
封羅山縣子

程國勝有德

后明廬州梁縣人任管軍上千戶贈武節將軍飛騎
尉封梁縣子

常惟德任驍騎衛管軍鎮撫贈武德將軍
封懷遠縣子

王德任驍騎衛管軍上千戶贈武節將軍
封合肥縣子

王咬住任中翼元帥府副使贈明威將軍上驍騎都
尉封太原郡伯

朱鼎任長鎗千戶所管軍上千戶贈武節將軍上驍
騎都尉封合肥縣子

張志雄趙普勝故將善戰號長張陳友諒嘗普勝志
雄為友諒將歲庚子閏五月從友諒犯龍灣

上命將擊敗友諒志雄遂降志雄嘗怨友諒故龍灣之
戰無鬪志既降盡獻取安慶之策王師遂克之既而

友諒復陷安慶上大怒以辛丑八月親征志雄從
行至安慶敵兵固守上以陸兵疑之敵兵動志雄

乃與廖永忠擊其水寨破敵舟八十餘艘獲船二十
有七遂克安慶長驅至小孤進次江州偽都友諒窮
蹙挈妻子棄城走武昌我師入江州獲馬二千匹糧
十數萬以功累官行樞密院判官兼水軍元帥至是
七月己丑與友諒戰死贈安遠大將軍輕車都尉封
清河郡侯

李志高任水軍元帥府同知元帥贈懷遠大將軍輕
車都尉封隴西郡侯

汪清 前有傳

常德勝任大號千戶所管軍右副千戶贈武毅將軍

飛騎尉封壽春縣男

鄭興任雲騎後都尉贈武毅將軍飛騎尉封隨縣男

袁華任管軍右副千戶贈武毅將軍飛騎

尉封虹縣男

昌文貴任元帥府左副元帥贈懷遠大將軍輕車都

尉封汝南郡侯

余昶任元帥府左副元帥贈懷遠大將軍輕軍都尉

封下邳郡侯

陳冲任管軍千戶贈武節將軍驍騎尉封巢縣子

王喜先任管軍千戶贈武節將軍驍騎尉

封定遠縣子

汪澤任管軍千戶贈武節將軍驍騎尉封廬江縣子
丁宇任管軍千戶贈武節將軍驍騎尉封合山縣子
逯德山任管軍鎮撫贈武節將軍驍騎尉
封汝陽縣子

羅世榮任雲騎後都尉贈武毅將軍飛騎尉
尉封隨縣男

史德勝任管軍千戶贈武毅將軍飛騎尉
封定遠縣男

徐公輔任金斗翼元帥府右副元帥贈懷遠大將軍
輕車都尉封東海郡侯

劉義任帳前水軍元帥府右副元帥贈懷遠大將軍
輕車都尉封彭城郡侯

陳弼任金斗翼元帥府右副元帥贈懷遠大將軍經
車都尉封潁川郡侯

裴軫任管軍上千戶贈武節將軍驍騎尉
封定遠縣子

王理任管軍左副千戶贈武毅將軍飛騎
尉封五河縣男

王仁任管軍千戶贈武毅將軍飛騎尉封舒城縣男

曹信任管軍鎮撫贈武德將軍飛騎尉封舍山縣男
永樂四年八月饒州府言都陽康山忠臣廟圯堙請
命脩治

太宗顧侍臣歎曰此皆首位

皇考成帝業者不幸遇艱難效忠奮義以死昔人成德
百世紀今不數十年而廟壞不治豈報德勸功之道
今國家於異代忠義之臣猶致禮其祠墳况

皇考股肱爪牙之臣我禮父母所愛亦愛之况有功於
國乎遂命工部即遣官督脩仍諭所司歲時嚴祀禮
守廟者悉復其家

康山忠臣廟記

孫原貞

德興人
兵部尚書

人臣死忠享廟祀於其死所者如紀信血食滎陽乘
黃屋誑楚脫君難以死於此張巡許遠南霽雲雷萬
春血食睢陽守孤城捍虜盡臣節以死於此韓成宋
貴等三十六臣血食康山奉天討偽漢殉君義以死
於此是皆得其死所而有功當時者也然漢滅楚而
高祖之大業成唐滅虜而肅宗之舊業振我

皇明滅偽漢而大統猶未集四征僭亂將士固有力戰
而死者獨報韓成等如漢之信唐之巡之遠廟而祀
之何哉蓋自元綱解紐紅巾倡亂群雄僭據偽宋韓

林兒據中原偽漢陳友諒據江漢偽吳張士誠據浙西偽夏明王珍據巴蜀其他竊據尤衆天命我太祖高皇帝龍飛濠泗忠良景從成等咸際會風雲於其間由是撫有淮甸誓師南渡遂平江左定都金陵其陳友諒發蒙衝驅醜類攻圍我豫章

天威震怒躬率舟師進討於鄱陽湖之康郎山將士一心整甲兵操舸艦受廟筭應神機乘風以陷其陣飛火以焚其舟出奇以擣其虛設伏以襲其遁大戰五晝夜成等皆當先力戰惟

君令是聽義不顧身衝鋒刃而必進冒矢石而不避乘我軍威復追及之陳友諒中流矢死餘衆遂降而江漢平自後平諸僭竊靖中原定燕京所至郡邑望風降附間有弗順或一戰而降或再戰而克未有若鄱湖鏖戰數日克大敵滅大憝我

皇明龍興實肇基於此其效死破敵有功之臣又皆重瞳覩其忠肝義膽簡在宸衷是宜褒封追贈建廟于康山封侯爵十二人韓成宋貴王勝陳兆先李信余昶昌文貴李志高張志雄徐公輔劉義陳弼公爵一人丁普郎伯爵二人程國勝王咬住子爵十三人姜潤后明王德常惟德逯德山汪清朱鼎裴軫王

鳳顯王喜先陳冲汪澤丁字男爵八人表華鄭興曹
信史德勝羅世榮常德勝王理王仁序其位次設其
像貌定其祭儀主祀事者餘千縣官也縣令邵崑偕
縣丞張永主簿楊信嘗謁廟下見棟宇傾頽像或剝
落乃相與謂曰祀典弗嚴責在有司於是各出俸資
鳩工市材令總其綱丞釐其務簿董其役工效其能
民效其力經始於天順庚辰十一月落成於辛巳四
月廟宇崇嚴像設雄偉重門兩廡齋舍神厨皆備墻
垣悉完悉美觀者感悅邑之耆耆曰廟建國初褒獎
忠烈僅百禩而一新厥工宜紀邑庠司訓立弘具書

遣生貞趙祥高昂來求記予觀自昔及今君天下者
肇造丕基恢復舊業固雖天與人歸必有忠臣良將
為之羽翼爪牙以驅叛除逆匡濟艱危而後天下底
平崇德報功於其以死勤事之臣尤宜憫恤故廟榮
陽而祀信廟睢陽而祀巡遠廟康山而祀成祀貴諸
臣皆祭義所當祭有司所當敬其事也今賢令佐同
心協力重脩廟貌以虔妥開國威靈生氣凜凜誠良
有司克遵朝典表忠以勸忠也俾後之人臣事君遇
大事於臨機決策之際知有其君不知有其身故死
以成大功濟大難全大節伸大義於天下後世名收

譽重如此後之良有司慎勿墮厥緒焉是為記



